

Arroilen jaitsiera Pirinioetan

Ekainaren 10a eta 12a bitartean Artarrai Mendi Taldeko kide batzuk Pirinioetara joan ziren ferrata eta arroila-jaitsierak egitera. Hau da bidaiaren kronika eurak azalduta.

Ostiralean bi furgonetatan sartu eta lau orduko bidaiaren egina genuen Artarraiko 17 lagun Brotoko aterpera joateko, Aragoiko Pirinioetan. Larunbatean Sorrosal ferrata igo eta bi rapeletan ia 100 metroko ur-jauzia jaisteko asmoa genuen baina ur gehiegi zegoenez, hustuko zen itxaropenarekin, iganderako uztea erabaki genuen.

Horren ordez 'Cueva del moro' kobazuloa zeharkatu genuen. Ordu t'erdi eman genuen narrasean eta lokatz artean arroilara iristeko. Eskerrak neoprenoak generamatzan! Egia esan, eguzki izpiak sartzen ez diren toki ezkutu horietan sentsazio nahasiak izaten dira nagusi: bakardadea, ikara, harridura...

Kobazuloaren irteeran Viandico arroila dago eta handik aurrera rapelatzen, saltoka eta ur gardenetan igeri eginez jaitsi ginen. Arratsaldean, berriz, beste arroila bat jaitsi genuen, La Gloces, oso polita estetikoki.

Zoritxarrez Sorrosal ur-jauzian istripu larri bat gertatu zen igandean. 45 metro rapelatu ondoren ur putzu erraldoian, badirudi gehiegizko ura eta nekearen ondorioz, gidari profesionalekin zihuan taldeko kide bat ito egin zen. Helikopteroak hilik atera zuen eta lur jota gelditu ginen. Istripua izan ondoren, ur-jauzian ur gehiegi zegoela kontuan hartuta eta gure taldean eskarmentu gutxiko jendea zegoenez, Sorrosal ez jaistea erabaki genuen.

Etxera bidean Fago arroilara abiatu ginen, baina sekula ikusi ez dugun jendetza zegoen bertan eta azkenean Yesako urtegiaren hartu genuen atsedena eta 12 metroko zubi batetik salto eta igeri eginez eman genion bukaera asteburuari. Nekatuta baina zoriontsu eta irribera itzuli ginen Ermura hurrengo irteera noiz antolatuko desiratzen.

Zer dira?

Arroilak edo 'kanoiak' orain dela milaka urte, glaziazio osteko garaietan urak kareharrin eragindako higadura edo erosioaren ondorioz sortu ziren. Urte askotan zehar arrain, anfibio, narrasti eta hegazti harraparien bizileku izan ziren arroilak. Baina lau-rogeiko hamarkadan sakonera horiek kirol ikuspegitik aztertzen hasi ziren hainbat mendizale eta espeleologo frantziar: horrela sortu zen arroilen kirol jaitsiera.

Ferratak osterara, eskalatu gabe, burdinazko kate, 'pasamanos', zubi, tirolina eta eskailera bidez mendira igoztea posible egiten duen kirol mota bat da, hori bai, beti ere segurtasun neurriak hartuta. Berez jatorria munduko lehenengo gudan dute, Italia aldean etsaiak zelatazko asmoz harrizko mendi tontorretara bidea errazteko jarri zirelako.

Arriskutsuak

Artarrain urte asko darabagu era honetako ekintzak antolatzen (batzuk orain dela 20 urte inguru hasi ginen praktikatzen) eta gero eta zale gehiago daude: azken batean arroilak aqua-parkak bezalakoak dira baina natural-naturalak!

Kirol hauek praktikatzen ez da prestaketa fisiko berezirik behar. Hala ere, material egokia erabiltzea oso garrantzitsua da, bestela norberaren bizitza arriskuan jartzen da.

Jakin badakigu arroilak, ferratak eta era horretako ekintzek arriskua dutela, zerk ez? Noizbehinka istripuak gertatzen dira eta komunikabide guztietan agertzen direnez, badirudi oso arriskutsuak direla. Baina normalean segurtasun neurriak eta material egokia erabiliz gero, ez da ezer gertatu behar.

Arroiletarako beharrezkoak den materialaren artean honako tresna hauek ditugu: hotzetik eta zaurietatik babestuko gaituen neoprenoak jantzia, oinetako egokiak, arnesa, kaskoa, sokak eta rapelatzeako eraitsgailua. Horiez gain ferratetan kolpeleungailua (edo disipadorea) erabiltzen dugu. Artarrain bertan daukagu material hori guztia.

Koldo Aranberria




**CITROËN
AUTOS AMEDI**

Zearreko buelta 3 L8 pab.
Tel. eta Faxa. 943 17 04 14

**solozabal
tabakoak**



torrekua 1
tel./fax: 943 17 07 33



**DULCE
BEBÉ
PEQUE'S**

0 eta 4 urte
bitarteko
umeentzako
moda eta
puerikultura

Zubiaurre 30 · ERMUA
943 170 005